



Udar **SIPA-e** na akciznu mafiju u Bosni i Hercegovini

# Prošvercovali 55 tona duhana, državu oštetili za skoro osam miliona KM

Osumnjičeno 14 osoba, pretreseno 25 objekata u Grudama, Sirokom Brijegu, Citluku, Zenici i Sarajevu

Pripadnici Državne agencije za istrage i zaštitu (SIPA) jučer su ujutro na području Gruda, Širokog Brijega, Citluka, Zenice i Sarajeva izveli akciju kodnog naziva "Lištica" radi suzbijanja duhanske mafije.

## Naredbe Suda

Akcija je izvedena prema naredbama Suda BiH i Tužilaštva BiH, a **SIPA-i** su podršku pružili pripadnici Uprave za indirektno oporezivanje BiH te ministarstva unutrašnjih poslova Kantona Sarajeva, Hercegovacko-neretvanskog, Zapadnohercegovačkog i Zeničko-dobojskog kantona.

- Pretreseni su objekti na 25 lokacija i uhapšeno je više osumnjičenih zbog sumnje da su počinili krivično djelo organizirani kriminal u vezi s nedozvoljenim prometom akciznih proizvoda, nedozvoljenim skladištenjem robe, porezne utaje ili prevare i pranja novca. Tokom pretresa pronađeno je i oduzeto više od pet tona rezanog duhana, oko 18 tona duhana u listu, tri mašine za sječenje duhana, veća količina novca u gotovini, četiri vozila, više od 800 kutija cigareta bez porijekla i drugi predmeti koji mogu poslužiti kao dokaz u daljem postupku - saopćili su iz SIPA-e.

Kako navode iz Tužilaštva BiH, u ovoj akciji meta je 14 osoba osumnjičenih za ova krivična djela.

- Ova akcija predstavlja odlučnu akciju agencija za provođenje zakona u borbi protiv "duhanske mafije", koja čini veliki broj krivičnih djela, oštećujući budžet Bosne i Hercegovine

za višemilionske iznose, čime se nanosi šteta svim građanima naše zemlje i stječe enormna nezakonita imovinska korist pojedincima - saopćeno je iz Tužilaštva BiH.

Pripadnici grupe za organizirani kriminal sumnjice se da su od novembra 2015. do februara 2016. godine, radi stjecanja protivpravne imovinske koristi, nezakonito nabavljali duhan u listu, vršili njegovu preradu i rezanje te neovlašteno prodavali veće količine rezanog duhana preprodavcima i krajnjim kupcima širom BiH, bez prethodnog obilježavanja akciznim markicama i plaćanja obavezne akcize i PDV-a.

## Intenzivna istraga

Procjenjuje se da su svojim nezakonitim djelovanjem u tri mjeseca prodali najmanje 55 tona duhana, čime je budžet BiH oštećen za skoro 7.850.000 KM, a pribavljena je protivpravna imovinska korist veća od 1.200.000 KM.

Akciji je prethodila intenzivna kriminalistička istraga, koju su istražitelji SIPA-e proveli pod nadzorom Tužilaštva BiH radi dokumentiranja nezakonitih aktivnosti osumnjičenih.

**A. ALJIMI**

## Kupovali nekretnine i vozila

Kako saznajemo, istragom je obuhvaćena i njihova nelegalno stečena imovina, koja će biti blokirana do okončanja sudskog postupka.

Osumnjičeni su tokom dužeg vremenskog perioda od novca koji su nelegalno stekli švercovanjem duha-

na, kupovali nekretnine i skupocjene automobile.



*Razbili 12-članu arupu švicera*



*Istražitelji pored zaplijenjenog duhana*

*Zaplijenjene i vage*